

## Mara

Mara est unu comunu italianu de 7.774 personis de sa Provìncia de Casteddu, in Sardìnnia, e est a 87 metrus impitzus de su mari.

### Stòria

In su logu de Mara ddoi bivit genti giai de s'eneolìticu (3000 annus innantis de Gesu-Cristu). In Cùcuru Craboni ddoi ant agatau una necròpoli de sa cultura de Monti Craru, imperada finsas de sa genti de sa cultura de Bunnànnaru (primu edadi de su brunzu).

Is nuraxesus ddoi ant lassau arrastus de importu, difatis ddoi funt ancora paricis nuraxis. Agoa funt arribaus is fenìcius e is pùnicus. In su sartu de Carroi ddoi ant agatau is arrestus de unu tèmpiu pùnicu, duas stàtuas de pedra codina de su deus Bes, chi imoi funt allogadas in su museu archiològicu de Casteddu. In cussu tempus e a is tempus de is romanus aicetotu, in custa parti de Sardìnnia preniant sa terra a lori.

In s'edadi de mesu at fatu parti a su giudicau de Casteddu, in sa curadoria de su Campidanu de Casteddu. A cussa ora s'agatànt paricis biddixeddas piticheddadas (Mara e Calagonis puru). Maracalagonis est nàscia in su tempus de is aragonesus, candu duas biddixeddas de sartu, chi fiant acanta de pari, si funt pinnigadas apari, ca is de Calagonis si-ndi fiant andaus a Mara, ca bidda insoru fut giai mesu sbendonada.

Mara fut una bidda de pastoris po su prus, in su cabu de giossu, intra is montis de Serpeddi e is Seti fradis, cun paricis nuraxis chi imoi funt sderrutus e sdorrobaus puru. Calincunu arrastu de custus nuraxis nc'est abarrau in is sartus de Santu Giorgi, Sa Spragaxa, Roperi, Pedra 'e Casadas, Mitza 'e Fonàiri, Mitza 'e Ganni, Mitza 'e Crabitu, S'arriu 'e Sici, Cuili 'e Lèpiri, Sa Domu 'e s'Orcu, Scoa Bois, Monti Nieddu, Sirigàrgius e àterus puru. Fiant, e funt ancora, puntus de importu po s'orientai in su sartu.

Calagonis fut una bidda acanta de Mara. Innoi in su 82 apustis de Cristu, candu s'agatàt s'obispu Tènnaru e cun s'imperadori romanu Traiano, nci fiat nàsciu e agoa martirizau puru, cun d-unu obilu a conca, Santu Stèvini. De custu santu in sa bidda ddoi funt is arrelìchias ancora. Sa conca cun s'obilu est allogada in d-unu stùgiu impari a àterus ossus chi funt ainturu de sa stàtua, asuta de s'artari de crèsia, chi est de su 1925. Est finas su santu patronu de sa bidda de Mara.